

中國史學叢書

文天祥年譜

楊德恩著

商務印書館發行

文天祥年譜

公諱天祥，字宋瑞，一字履善，號文山，吉州廬陵縣淳化鄉富田人。

廬陵縣志卷二十六人物志：『文天祥，廬陵淳化鄉富田人。』又跋：『按宋史文山傳，以爲「吉之吉水人」，誤甚。據寶祐四年登科錄云：「本貫吉州廬陵縣。」文山集序其家世云：「廬陵文氏，先世居永和鎮，徙富田。」與吉守李書云：「某居廬陵南陬。」與廬陵令李書云：「某邑人也。」元夕律句云：「孤臣腔血滿，死不愧廬陵。」臨難自南安軍北行，絕粒數日，私念死廬陵，不失爲首丘。集中所載甚明，故通志考核精當，載入廬陵。府志人物，全錄宋史原文，甚合志家體例，而於籍系誤處，未爲辨正，故補著於此。』

清林有席文丞相里居考：『宋史文信國天祥本傳，稱「吉之吉水人。」吉水，本廬陵所分，其所居富田故里，又吉水廬陵壤地相錯之區。富田亦有上下之別，而公實籍廬陵，而不隸吉水。自宋史

本傳外，爲公書事者不一。同時鄧光薦註年譜，元劉岳申、明胡廣各爲立傳，彭序爲富田祠祭田記，羅洪先爲富田祠記，多核實而不襲其說。然其里介吉水廬陵之交，同爲一郡，地以人重，彼此固無嫌於互稱也。又考公文集所自述，其考革齋先生：「嘗考次譜系，文氏由成都徙吉州，五世祖炳然居永和鎮，高祖正中由永和徙富田，」然則公實富田，遷徙居址，皆廬陵也。公自爲年譜亦同，初不一及吉水。或傳廬陵香林有五鳳岡，岡之下爲龍窟，里人指爲公所自生，後乃長於富田。明陳嘉謨云：「事遠不可考，豈兩地互借爲重乎？」作截句二章以志感，有一空餘兩地留喬木，傳信傳疑未可知」之句。殊不知其概無可疑也。富田之水曰富川，其流歸同江，同江亦廬吉交界境。其山曰文山，則在廬陵八十二都，公所取以自號者也。志載爲文山故里，集中有文山觀大水記云：「自文山門入，道萬松下，至天圖畫，一江橫前。行數百步，盡一嶺，爲障東橋。橋外數十步，爲道體堂。」堂爲文山宦後所構。公之桑梓，居文山之麓，其村居名富田，道體堂在焉。公之墓，又在廬陵舜化鄉鷺湖，記墓者以爲距公桑梓僅十餘里。然則自始生至卒葬，無一非廬陵境，又不必沿永和鎮、龍窟之說，而乃信公爲廬陵人矣。因修文山祠，檢閱宋史，特參合諸說確有據依者，爲公著里居之實，俾後學有

考。』（載廬陵縣志卷五十一藝文志）

廬陵縣志卷二地輿志：『淳化鄉，同治元年奉文敬避御諱，改為舜化鄉，在縣東南境，即宋順化鄉也。東北接吉水中鵠鄉，東界吉水文昌鄉，東南界永豐明德鄉，南界贛州興國縣境，西界泰和仁善鄉，北界儒林鄉，領十二都四十六里。』按謂即宋順化鄉，今公集中均作淳化，未有作順化者，疑縣志誤也。

廬陵文氏，來自成都。公六世祖炳然，徙居永和鎮，五世祖正中，又徙富田，遂定居焉。

先君子革齋先生事實：『先君子嘗考次譜系，文氏繇成都徙吉。五世祖炳然居永和鎮，高祖正

中繇永和徙富川。』（文集卷十一）富川為富田水名，即富田也。按此為公父推算，在公自為六

世祖、五世祖矣。

高祖利民，妣郭氏。曾祖安世，贈太保，邢國公，妣劉氏。祖父時用，贈太傅，永國公，妣鄒氏，繼劉氏。父儀字

士表，人稱革齋先生，贈太師，惠國公，母曾氏，封齊魏國夫人。

先君子革齋先生事實：『曾祖利民，妣郭氏。祖安世，妣劉氏。考時用，妣鄒氏，繼母劉氏。世有吉德，

鄉以君子長者稱。』(文集卷十一)

紀年錄注：『曾祖安世，贈太保邢國公。大父時用，贈太傅永國公。父儀字士表，號稱革齋先生，贈太師惠國公。母曾氏，齊魏國夫人。』

答歐陽祕書承心制說：『先伯祖生男三：長曰行，是爲先伯；次爲先人；又次曰信，是爲先叔。女一，是爲吾姑。先人歲餘嗣先祖後。』(文集卷十)

義陽逸叟曾公墓誌銘：『公諱珏，字天錫，號義陽逸叟，天祥外王父也。曾氏世家盱江，徙吉之泰和梅溪。』又：『子二：棐，榘。女四：適錢光延、康師顏、于天秩，其仲，天祥母也。』(文集卷十一)

公弟三：璧、霆、璋。妹三：懿、淑、順。

文璧齊魏兩國夫人行實：『先母兩國夫人諱德慈，吉泰和義陽曾氏中女也。』又：『子男四：天祥、霆、孫、璋，霆、孫早卒。女三：懿、淑、順，順早夭。』(文集卷十八附錄)

集杜詩孫棗序：『宣教郎，帶行監官告院，知吉川龍泉縣孫棗，予長妹夫也。』又彭震龍序：『宣教郎，帶行太社令，知吉川永新縣彭震龍，予次妹夫也。』(文集卷十六)


妻歐陽夫人，妾顏孺人，黃孺人。子二：道生、佛生。女六：定娘、柳娘、環娘、監娘、奉娘、壽娘。

集杜詩妻序：『夫人歐陽氏，環之生母，顏、佛之生母，黃。』又長子序：『予二子，長曰道生。』按次子即佛生。又二女序：『予六女，長定娘，次柳娘，次環娘，次監娘，次奉娘，次壽娘。』（文集卷十六）

其後二子皆亡，以璧次子陞爲嗣。

廬陵縣志卷二十八人物志：『文陞字遜志，廬陵人，宋丞相天祥弟璧之次子也。天祥被執，諸子死，以陞爲後。璧爲元惠州總管。陞贅清江家焉；皇慶間，授集賢直學士，代祀嶽瀆，卒於贛。子富，累官延平路總管。』

茲列公之譜系如下：



按天禎、天祐，據廬陵縣志卷三十人物志：『文天禎，廬陵人，天祥兄也。寶祐間鄉舉，署廣濟學諭，造士有方。宋亡，天祥死節，天禎遜跡廣濟之五里橋東，執節而終。弟天祐，亦從義天祥軍中。天祥被

執，天祐死之。」又公先君子革齋先生事實：「季父歿，不幸子病廢，經紀其家，撫幼姪等己子。疏從遺孤，振翼之俾蒙于成。」又公與岳吉甫：「先人季子生二十矣，號曰學文，實未知方。有從第一人，同堂而習，年相若，而學相似也。」疑此從弟即指天祐。至天禎既稱公兄，或即公伯父行之子也。又公本生祖名時習，見廬陵縣志卷二十四選舉志封贈。公體貌豐偉，英姿雋爽。

元劉岳申文丞相傳：「公英姿雋爽，目光如電。」

宋史本傳：「體貌豐偉，美皙如玉，秀眉而長，顧盼燁然。」

性尤澹泊，不求財利。每有所入，盡以散族姻鄉友之貧者。

紀年錄：「予於山水之外，別無嗜好，衣服飲食，但取粗適，不求鮮美。於財利至輕，每有所入，隨至隨散，不令有餘。常歎世人乍有權望，即外興獄訟，務爲兼并；登第之日，自矢之天，以爲至戒，故平生無官府之交，無鄉隣之怨。閑居獨坐，意常超然，雖凝塵滿室，若無所睹，其天性澹如也。於官情亦然。自以爲起身白屋，邂逅早達，欲俟四十三歲，即請老致仕，如錢若水故事。使國家無虞，明良在上，退

爲潛夫，自求其志。」

元劉岳申文丞相傳：「既第，誓不倚勢近利，自祿賜所入，盡以散族姻鄉友之貧者。」平生嗜象弈。嘗以其危險制勝奇絕者，爲四十局勢圖。

紀年錄注：「公平生嗜象弈，以其危險制勝奇絕者，命名自「玉曆金鼎」至「單騎見虜」爲四十局勢圖，悉識其出處始末；「玉曆」蓋公所居山名也。」

宋理宗端平三年丙申（一二三六）公年一歲。

公以五月二日子時生。大父夢公騰紫雲而上，命名雲孫。（紀年錄。惟將予改爲公，下同。）

元劉岳申文丞相傳：「大父時用，夢兒乘紫雲下，已復上，而丞相生，故名雲孫。」

宋寶祐四年登科錄：「文天祥字宋瑞，小名雲孫，小字從龍。」

是年，公父革齋先生年二十二歲。公母曾氏年二十三歲，距來歸已二年。

先君子革齋先生事實：「先君子諱儀，字士表，生嘉定乙亥八月二十四日。」（文集卷十一）嘉定爲宋寧宗年號，乙亥爲嘉定八年（一二一五），以此推算爲二十二歲。

文壁齊魏兩國夫人行實：『先夫人生於嘉定甲戌十二月十四日戌時』又：『以端平甲午，歸於先君子。』（文集卷十八附錄）甲戌爲嘉定七年（一二一四），以此推算爲二十三歲。甲午爲端平元年（一二三四），故來歸至生公，已距二年。

祖父時用，年未詳。祖母鄒氏，早卒。繼祖母劉氏，年四十八歲。

紀年錄：『咸淳十年六月，慶祖母劉夫人年八十七。』咸淳十年爲一二七四年，以此推算，是年爲四十八歲。

是年蒙古立國已三十一年，金亡已三年。

宋理宗嘉熙元年丁酉（一二三七）公年二歲。

是年，長弟璧生。

先君子革齋先生事實：『不肖孤二十有一載，弟方冠且髻。』（文集卷十一）疑方冠者指璧，髻者指璋。按古人以二十歲爲成人，方加冠，似公與弟璧相去僅一歲也。又公與弟璧同年舉貢士，亦足見兄弟年齡相去不遠也。

宋理宗嘉熙二年戊戌（一二三八）公年三歲。

是年，陸秀夫字君實生。

宋理宗嘉熙三年己亥（一二三九）公年四歲。

是年，鄭思肖字憶翁號所南生。

宋理宗嘉熙四年庚子（一二四〇）公年五歲。

公仲弟霆孫生。

先君子革齋先生事實：『歲乙卯，天祥璧俱叨與計偕，時仲弟霆孫，年十有六。』乙卯指理宗

寶祐三年（一二五五）以此推算，當生於是年。

宋理宗淳祐元年辛丑（一二四一）公年六歲。

疑自是年起，革齋先生日授公兄弟讀，督責綦嚴。

先君子革齋先生事實：『始天祥兄弟幼且長，先君子不疾其不令，昭蘇蒙滯納之義，方日授書，痛策砭。夜呼近燈，誦日課。誦竟，旁摘曲詰，使不早恬，以習於弗懈。小失睡，卽示顏色。雖盛寒暑，

不縱檢束。天祥兄弟，慄慄擎槃水，無敢色於儉。」（文集卷十一）

其後亦招聘師友講說。金盡，又親督之，並授公以轉教諸弟。

同上：「自此名師端友，招聘仍年。至時，先疇給費。久之，室罄，力弗逮，迺率天祥兄弟，藏脩於竹居，（公父性愛竹，依竹闢一室，傍竹居，或稱竹居。）陳所哀織軸，俾挾精剔華，鈎索遐奧，董綱要，竟日夕弗倦。雖貧，浩然自怡。有未見書，輒質衣以市，得書，注意鑽硃。又以授天祥，俾轉教諸弟。繇是程督益峻，書警語徧窗壁，如三尺在目。見爲文章，撥斷正氣，輒不憚，必維以法度。天祥兄弟奉嚴訓，蚤暮侍膝下，唯諾怡愉，不趨師友。或書聲吾伊，或斂襟各靜坐潛諷，或掩卷相與戚嗟人情世道。此時氣象，父母俱存，兄弟無故，天下之樂莫加焉。」

集杜詩曾先生序：「秀峯曾先生鳳，予師也。太學釋褐，累遷監丞。」（文集卷十六）又宋鄧光薦文丞相督府忠義傳，亦云：「曾鳳字朝陽，廬陵人。丞相嘗從鳳學。自太學釋褐，爲衢州教授，累遷國子監丞。」（文集卷十九附）疑此曾先生，卽當時公家塾師也。

是年王應麟、歐陽守道俱登進士。江萬里知吉州，創白鷺洲書院於州城東白鷺洲上。

廬陵縣志卷十六學校志書院：『白鷺洲書院在郡城東白鷺洲上，宋淳祐元年辛丑知吉州軍江萬里建。奏於朝，置山長，理宗御書「白鷺洲書院」以賜院內。』又宋劉辰翁江文忠祠記：『先生慶元戊午，其爲吾州年四十有四。』按戊午爲慶元四年（一一九八），至是年適四十四歲也。

宋理宗淳祐二年壬寅（一二四二）公年七歲。

宋理宗淳祐三年癸卯（一二四三）公年八歲。

宋理宗淳祐四年甲辰（一二四四）公年九歲。

是年留夢炎登進士第一。（明柯維騏宋史新編本傳）

宋理宗淳祐五年乙巳（一二四五）公年十歲。

宋理宗淳祐六年丙午（一二四六）公年十一歲。

是年祖父時用歿。（文集卷十答歐陽祕書承心制說）

宋理宗淳祐七年丁未（一二四七）公年十二歲。

宋理宗淳祐八年戊申（一二四八）公年十三歲。

宋理宗淳祐九年己酉（一二四九）公年十四歲。

是年謝翱字臯羽生。

宋理宗淳祐十年庚戌（一二五〇）公年十五歲。

宋理宗淳祐十一年辛亥（一二五一）公年十六歲。

是年冬，吳潛爲右丞相兼樞密使。（宋史本傳）

宋理宗淳祐十二年壬子（一二五二）公年十七歲。

是年季弟璋生，從弟天祐生。

與聶吉甫：『先人季子，生二十年矣。有從弟一人，同堂而習，年相若而學相似也。』（文集卷

五）按此書作於咸淳八年（一二七二）公致仕居文山時，故疑是年璋天祐生也。又先君子

革齋先生事實：『不肖男二十有一載，弟冠且髻，疑髻卽指璋也。

十一月，吳潛罷相。

宋理宗寶祐元年癸丑（一二五三）公年十八歲。

是年邑校簾試，名列冠榜。

與文侍郎及翁跋：『本心（及翁號）癸丑榜眼。後來廬陵，省其叔可則。先生時年十八，邑校簾試，全篇論題曰：「中道狂狷鄉原如何。」冠榜，遂通譜焉。道體堂謹書。』通譜蓋與文及翁通譜也。

紀年錄注：『傳公方爲童子時，游鄉校，見所祀鄉先生歐陽修、楊邦乂而下，咸諡忠節，祠祝像設甚嚴，意欣然慕之，竊嘆曰：「沒不俎豆是間，非夫也！」』

宋史本傳：『自爲童子時，見學宮所祠鄉先生歐陽修、楊邦乂、胡銓像，皆諡忠節，欣然慕之曰：「沒不俎豆其間，非夫也！」』

元劉岳申文丞相傳：『稍長，游鄉校，見歐陽文忠公、楊忠襄公、胡忠簡公、周文忠公、楊文節公祠像，慨然曰：「沒不俎豆其間，非夫也！」』

按上文二稱童子，一稱稍長，皆無年歲可據。惟古人通稱十九以下皆爲童子，且公既十八歲

時在邑校，邑校亦鄉校也，故知其見歐陽修等祠像，當在是年。又按楊邦乂、楊萬里均爲吉水人，則公所見之學宮，似又爲吉州學宮，蓋當時廬陵爲吉州首邑，郡邑兩學宮，固相去不遠也。

宋理宗寶祐二年甲寅（一二五四）公年十九歲。

是歲公夢召至帝所。

紀年錄注：『是歲，公夢召至帝所，帝震怒，責其不孝。公哀訴，以臣實孝。帝曰：「人言卿不孝，卿言卿孝。」賜以金錢四，遣去。公出門，而震雷欲擊之，自嘆曰：「幸免不孝之罪，而又不免雷擊。」驚覺，汗如雨。後一舉登第，而有父喪，但未解四金錢爲何義。』

宋理宗寶祐三年乙卯（一二五五）公年二十歲。

是歲春，赴縣城。

紀年錄注：『乙卯春，公家趨城三十里，曰冷水坑。旅店胡翁，夜夢門外巨石，有龍蛻爪其上，夢甚著，覺而異之。昧爽，卽擁帚掃除石，驗所夢。已而公至，則坐于石更屨。翁言：「早寒，願飯而去。」詞意甚勤。公問故，以夢告，且曰：「他日必富貴，願垂憐我家。」公諾焉。』

卽入白鷺洲書院肄業，時山長爲州人歐陽守道。

祭歐陽巽齋先生：『某弱冠登先生之門，先生愛某如子弟，某事先生如執經，蓋有年于茲。先生與他人言，或終日不當意。至某，雖拂意逆志，莫不爲之解頤。』（文集卷十一）巽齋，守道號也。

通潭州安撫大使江丞相：『某在門牆諸孫輩行中，而所以蒙鈞天造就，知愛綢繆，獨出乎諸生之右。然號爲登門，垂二十年，而至今庭下無愈之迹。古人負笈從師，不問道路之遠，某乃不能自拔如此，殆不可對人言也。』（文集卷五）江丞相，謂江萬里也。

按此二文，可知公於二十歲登歐陽守道之門。其云：『有年于茲，』謂自登門以來，有年于茲；蓋公明年卽中狀元，決無再在書院之理。據宋史卷四百十一歐陽守道傳：『歐陽守道字公權，一字迂父，吉州人。初名巽。少孤貧，自力於學。年未三十，翕然以德行爲鄉郡儒宗。江萬里守吉州，守道適貢於鄉，萬里獨異視之。淳祐元年舉進士，授雩都主簿。丁母憂，服除，調贛州司戶，其次在十年。後萬里作白鷺洲書院，首致守道爲諸生講說。』是知守道於淳祐元年舉進士，正萬里在